

2 Corintios

¹ Høøch Pablo hädaa nocy njahby. Jesucristøch tøø xwyiinguexy cooçh ja'a miädia'agy nyajwá'xät. Ja'a Dios jaduhñ mänaamb cooçh nyajwá'xät. Ja'a hermano Timoteo, tu'ugwiinmáhñdyhöch je'e xmiøødhity cooçh hädaa nocy njaay. Mijts hädaa nocy nyajnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt. ² Ween mijts ja'a Dios hoyhajt weenhajt xmiø'oy møødä Jesucristo. Dios hajxy nDeedyhajtäm. Jesucristo hajxy nWiindsønhajtäm.

³ Tsøgä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä, ⁴ hoy ñebiaty hajxy cu nja jajt cu nja habéjtäm. Paady hajxy jaduhñ xjiootcapxmøcpøjcäm, jaduhñ hajxy hoy njootcapxmøcpøjtägajtsämd pønjaty häyohmbaatp. ⁵ Hiç, nebiä Jesucristo chaaçhpøjquiän, jaanä jaduhñ hajxy ndsaaçhpøjcämbä. Y coo ja'a Jesucristo hajxy nmøød-híjtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm. ⁶ Coo højts ndsaaçhpøcy, mänit højts Dios xjiootcapxmøcpøcy. Y jaduhñ mijts njootcapxmøcpøjtägajtspä. Y jaduhñ mijts Diosmädia'agy nyajwiingapxø'øwät neby hajxy jaduhñ mnähwá'adsät. Coo mijts mdsaaçhpøjpät neby højts ndsaaçhpøquiän, mänit mijts njootcapxmøcpøgät neby hajxy jaduhñ hoy mmee'xtúgät. ⁷ Nnajuøøby højts coo mijts mmee'xtuga'añ, coo mijts Dios xjiootcapxmøcpøga'añ, hoy miä-

duhñtiä mijts cu nja tsaächpøc neby højts ndsaaçhpøquiän. Nmøød højts ja'a tøyhajt jaduhñ.

⁸ Mägu'ughajpädøjc, chojpy højts njoot coo hajxy mnajuó'øwät nebiaty højts jim ndsaaçhpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaançh tehñ jiootmayhajp højts hänajty. Høxtä mänaan højts jaduhñ coo ndijy højts hänajty jim nho'oga'añ, ⁹ coo ndijy häna'c hänajty tøø quiojyquiapxytiuñ coo højts hänajty xyagho'oga'añ. Paady højts jaduhñ njajty nhabejty, jaduhñ højts nnajuó'øwät coo jagooyä Dios xñäwá'anät, cab højts hamdsoo hoy nniñäwa'anóøjät. Haa ca'a, Dios jaduhñ yagjujypiojtä-gajtsp ja'a tøø yhó'oguiäbä. ¹⁰ Xñäwaan højts ja'a Dios coo højts häna'c hänajty jim xjia yagho'oga'añ. Homiä-naajä højts jaduhñ xñäwa'ana'añ. Nmøød højts ja'a tøyhajt jaduhñ. ¹¹ Naxy mijts ja'a Dios mdehñ pia'yá'axät maa højtsçøxpän. Jaduhñ højts mijts hoy xpiuhbédät. Coo jäya'ayhajxy nämay Dyiospa'yá'axät maa højtsçøxpän, mänit højts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ “Dioscujú'uyäp”, je'eguiøxpä coo højts Dios hoyhajt weenhajt xmio'oy.

¹² Jootcujc højts nnijiäwø'oyii coo højts hoy tøø njäya'ayhaty maa mijtsän hädaa yaabä naaxwiin. Dios højts jaduhñ xpiädaac coo højts hoy njäya'ayhädät. Jaaya'ay højts xyhijxp coo højts hoy njaançh jäya'ayhaty. Xpiuhbejp højts jaduhñ neby højts hoy njaac jäya'ayhädät. Cab højts hamdsoo hoy nhojiäya'ayhädät. ¹³⁻¹⁴ Hix, howyiinjuøøñä mijts tøø nnäjaayø'oy, caj chipjatiä. Caj mijts mänaa tøø nwiinhøøñ. Tøø højts nmädia'agy hajxy siémpräm xwyiinjuøøyyä. Chojpy højts njoot coo hajxy ca'xy mwiinjuó'øwät, jaduhñ hajxy mxoondá'agät maa højtsçøxpän coo ja'a Jesucristo hänajty quiädaactägat-sa'añ. Je'e hajxy nWiindsønñhajtäm. Mänit højts nxoon-

da'agaambä maa mijtscøxpän.

¹⁵ Nmøødhøch tøyhajt jaduhñ coo hõjts nmädia'agy hajxy ca'xy xwyiinjuø'øwaanä, páadyhøch hijty tøø nja wiinmay coo mijts jadähooc nøcxy cu nguhijxy. Jaduhñ hajxy jadähooc cu nxoonðáacäm nägøxiä. ¹⁶ Hiñ, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooç hijty nwiimbidaannä Macedonia, mänit mijts hijty jadähooc ndu'uguhixáangombä cooç hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty. ¹⁷ Pero cabä Dios jaduhñ miänaañ cooç jim cu nminøøyy maa mijtsän. Ca'a yhamdsoojóotøch jim tøø nga'a naxø'øy. Cab jaduhñ yhooyä coo hajxy mmänä'anät cóogøch tyjy jaduhñ ndu'ugcapxy nmetscapxy, cooç jim tøø nga'a naxø'øy. Ja'a häna'c-hajxy ca'a mäbøjpä, je'eds hajxy tu'ugcapxp metscapxp, ca'a yhøøçhä. ¹⁸ Dios hõjts xyhijxp coo hõjts nga'a høhñda'agy. Cab hõjts mijts mänaa tøø nmøødtu'ugcapxy tøø nmøødmetscapxy. ¹⁹ Hiñ, ja'a Jesucristo, ja'a Dioshuung, cab je'eduhñ mänaa tiu'ugcapxy mietscapxy. Homiänaajä tiømiädia'agy. Y coo hõjts mijts nyajwiingapxøøyy ja'a Jesucristocøxpä, paady hõjts nga'a tu'ugcapxy nga'a metscapxy, ni høøç Pablo, ni hermano Silvano, ni hermano Timoteo. ²⁰ Waambatiä Dios jecy miänaañ coo hänajty yajtøjiada'añ, cøjx jaduhñ tiøjiaty ja'a Jesucristocøxpä. Y coo hõjts ja'a mädia'agy nmäbøjcäm ja'a Jesucristocøxpä, jaduhñä Dios mõj jaanç nbäðacäm. ²¹ Pero ja'a Dios hajxy xpiuhbéjtäm nebiä Jesucristo hajxy jaduhñ nmøødhjttämdu'ugmädia'agy tehñgajnä, møød hõjts møød mijts nägøxiä. Jaanä Dios hõjts jaduhñ xwiinguejxpä coo hõjts ja'a miädia'agy nyajwá'xät. ²² Xyaghijp hõjts ja'a Dios quiø'jøoty ja'a yhEspirituhaam. Xyhuunghajp hõjts

jaduhñ. Xmióoyäm ja'a tøyhajt hajxy jaduhñ coo hajxy homiánaajä xcwieendähadáanäm.

²³ Dios ja'a tøyhajt mөөd cooch nga'a hөhñda'agy. Páadyhöch jim tөө nga'a naxө'өy Corinto maa mijtsän, cábөch njoot hánajty chocy coo mijts nhójät. ²⁴ Pero cab höjts mijts nhane'ema'añ nebiatiä Diosmädia'agy hajxy mmábögät. Hix, nnajuөөby höjts jaduhñ coo hajxy hamuumdu'joot mmábөcy. Nja wi'i piuhbedaamby höjts mijts jaduhñ nebiä Diosmädia'agy hajxy maas hoy mbanөcxät. Jaduhñ hajxy maas jootcujc mhídät.

2

¹ Mänáajөch jim nhuug hoobiän maa mijtsän, mänítөch mijts nhojy je'eguiөxpä coo hajxy hánajty hoy mga'a tuñ. Jootmayhájtabөch jim nwiimbijty. Hoorä, tөөch nmädoyhájcombä coo hajxy hoy mga'a túungombä. Tөөch nwiinmahñdyhaty cooch jim nga'a tsoj nөcxtägatsa'añ maa mijtsän, coo mijts jim nnä'a hojtägätsät. ² Hix, coo mijts nhojtägätsät, mänítөch jadähooc njootmayhada'añ. Pero chójpiөch njoot jaduhñ coo hajxy hoy mdúnät. Jadúhñhöch jootcujc nhídät. ³⁻⁴ Mänáajөch mijts jayөbajt nhuuc näjaayөөbiän, mänit mijts nmägäpxy nhanehmy coo ja'a mhaxөөгcuhdujt hajxy mnajtshixө'өwät. Jaanч tehñ jootmayhájpөch hánajty coo ja'a Diosmädia'agy hajxy hánajty hoy mga'a panөcxy. Hөxtä jöyyhöch jaduhñ. Paady mijts jaduhñ nmägäpxy nhane'emy nocyhaam, njaanч tehñ chojpy mijts jaduhñ. Cábөch njoot chocy coo hajxy mjootmayhádät. Coo ja'a mhaxөөгcuhdujt hajxy mnajtshixө'өwät nébiөch chamñ nmägäpxy nhane'emiän nocyhaam, mänítөch jim jootcujc nnөcx-a'añ maa mijtsän. Coo mijts ja'a Diosmädia'agy hoy cu mbanөcxy, cábөch jaduhñ mänaa cu njootmayhajty. Nnajuөөbiөch jaduhñ coo ja'a Diosmädia'agy hajxy hoy

mja wi'i pianøcxa'añ. Y coo hajxy jaduñ hoy mbanócxät, jaduñ hajxy nägøxiä jootcujc nhíjtämd, møød høøch møød mijts.

⁵ Ja'a mijts mmägu'ughajpä ja'a tøø quiädiéeyäbä, nägøxiä hajxy jaduñ tøø xñägädieeyóoyyäm, ca'a yhøøchähajtiä nidiuhm. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ. ⁶ Hoorä, tøø ja'a mmägu'ughajpähajxy chaaçhpøcy. Tu'ugwiinmahñdy hajxy mnibiaatä, paadiä mmägu'ughajpä hajxy myajcumädooyy. Hoorä, tøø jaduñ chaaçhpøjnä. ⁷ Hahixøøby hajxy jaduñ mmämée'xnät. Jaduñ hoy jiootcugóøguiumbät, y cab jaduñ hanaxiä jiootmayhädät. ⁸ Coo hajxy jaduñ mmämée'xnät, myajcøxøøgaamby hajxy jaduñ coo hajxy mjaançh tehñ chocy. ⁹ Paady mijts jayøbajt nnäjaayøoyy, nhixmajts mijts jaduñ pø tøyhájthøch nmädia'agy hajxy hänäjty xmiäbögaanä hamuumdu'joot. ¹⁰ Pønjaty mijts mmämee'xyp, jaanä jadúhñhöch nmämee'xaambä. Haa ca'a, pø tøøch häna'c nmämee'xy, páadyhöch tøø nmämee'xy, jaduñ mijts jootcujc mhídät. Jesucristøch jaduñ xyhijxp cooçh nga'a høhñda'agy. ¹¹ Coo hajxy jaduñ nnimiämée'xämd, cabä møjcu'ugong miäjädá'agät maa højtscøxphájtäm. Nnajuóoyyäm hajxy coo ja'a møjcu'ugong jiaançh tehñ miäwiinhøøñ.

¹² Cooçh jim nmejch maa ja'a cajpt jaduñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooçh jim ndägó'øwät Diosmädia'agy-yajwa'xpä. ¹³ Pero cooçhä hermano Tito jim nga'a paaty maa ja'a hermanodøjc-hajxiän, mänítøch ndägøoyy jootmayhajpä. Mänítøch nwiimbijnä. Mänítøch nnøcxy maa ja'a naax jaduñ xiøhatiän Macedonia.

¹⁴ Dioscujú'uyäp ja'a Dios coo højts xpiuhbety, coo

højts xyaghity tu'ugmädia'agy mөөдä Jesucristo. Jaduhñ højts ja'a Dios xpiuhbety coo højts ja'a møjcu'ugong nga'a yajmäjäda'agy majaty højts ja'a Diosmädia'agy nyajwa'xy ja'a Jesucristocөxpä. Homiädoonä ja'a jäya'ayhajxy miädoy nebiaty højts nyajwiingapxө'өy. ¹⁵⁻¹⁶ Xquiumaaby højts ja'a Dios coo højts ja'a miädia'agy nyajwa'xä ja'a Jesucristocөxpä. Pөnjaty hoy mädoob, pөnjaty mäbөjp, je'eds nähwa'adsaamb. Jugyhadaamb hajxy je'eduhñ cөjxta'axiөө nebiä Dios jiugyhatiän. Pero pөnjaty hoy ca'a mädoob, pөnjaty ca'a mäbөjp, cab hajxy jaduhñ ñähwa'adsa'añ. Je'eds hajxy haxөөгtuum nөcxy miähmө'өwa'añ. Caj pөñ yhamdsoo jada'añ Diosmädia'agy-yajwa'x. ¹⁷ Højts mäbөcypiä njajpy je'eguiөxpä coo højts ja'a Dios xwyiinguejxy. Hamuumdu'joot højts nduñ je'eguiөxpä coo højts ja'a Jesucristo tu'ugmädia'agy nmөөdhity. Xyhijxp højts ja'a Dios jaduhñ coo højts hoy nduñ. Jii häna'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyi'i miädiaacyy, je'eguiөxpä coo hajxy jia wi'i quiänaarhada'añ. Højts, cab højts jaduhñ nbahixy.

3

¹ Cab hajxy mmänä'anät coo tyijy højts nniguiumayii nebiä häna'c ñiguiumayijän, ja'a yhamdsoo mädia'agy hajxy miäwädiipiä. Coo hajxy hänajty maa ñөcxa'añ, mänitä hermanodөjc hajxy ñäma'ay coo nocy hajxy jaduhñ ween yhädiüunäxä cooc tyijy ja'a Diosmädia'agy hajxy hoy tөө yajwa'xy. Pero højts, cab højts jaduhmbä nocy nyajmaajiaty, ni coo mijts nyaghíxät, ni coo mijts xmió'owät. ² Hoy piөñä ñajuө'өy coo højts ja'a Diosmädia'agy hoy nyajwa'xy. Haa ca'a, tөө ja'a Diosmädia'agy hajxy mmäbөcy mänaa højts jim hoy nyajnähixө'өyän. Hix, njaančh tehñ chojpy højts mijts hamuumdu'joot.

Homiänaajä hõjts mijts njahmiejtsta'agy. ³ Coo ja'a Diosmädia'agy hajxy tøø mmäböcy, jaduñä cu'ug ja'a tøyhajt hajxy miøødä coo hõjts ja'a Jesucristo jaduñ xwyiinguejxy maa mijtscøxpän, coo hõjts mijts ja'a Diosmädia'agy nyajwiingapxø'øwät. Jujcy ja'a Dios. YhEspirituhaam ja'a Dios hajxy xyajmäböjcy. Jaduñ miäbaady coo ja'a Jesucristo tøø yuugjaay maa ja'a jäya'ay quiorazoncøxphajxiän. Cab jaduñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tuñ xiøhatiän Sinaí.

⁴ Paady hõjts jaduñ nmäna'añ, nmøød hõjts ja'a tøyhajt coo hõjts ja'a Jesucristo xwyiinguejxy. ⁵ Pero cab hõjts tii njada'añ hamdsoo. Dios hõjts jaduñ xpiuhbejp coo hõjts njädät. ⁶ Jaaya'ay hõjts jaduñ tøø xyajnähdijy coo hõjts ja'a hawiinjemybiä mädia'agy nyajwá'xät ja'a Jesucristocøxpä. Hädaa hawiinjemybiä mädia'agy, yhEspirituhaam hõjts ja'a Dios tøø xmiø'oy. Cabä Dios tøø jiahñä tsaagøxp nebiä jecyquiuhdujt jecy jiahyyän tsaagøxp. Yø'ø jecyquiuhdujt, cab jaduñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemyädia'agy hajxy mmäbögät, mänitä Dios hajxy xyagjugyhädät cøjxta'axiøø yhEspirituhaam neby je'e jiugyhatiän.

⁷ Hoorä, coo ja'a Dios ja'a jecyquiuhdujt jiahy tsaagøxp, høxtä haamb høxtä tsämaamb ja'a Moisés ja'a wyiin jiøjp hänajty, høxtä cabä israelita ja'a Moisés ja'a wyiin jiøjp hajxy hänajty hoy yheebaanä. Pero paquiä ja'a Moisés ja'a wyiin jiøjp jaduñ ñä'ä haañ ñä'ä tsämaamy. Paadiä Moisés ja'a wyiin jiøjp hänajty yhañ chämamy, tøø ja'a Moisés hänajty yhoy jim Dioswiinduum maa ja'a Dios hänajty tøø quiäda'aguiän jim tungøxp. Y møcmäjaa ja'a Dios jiaanç tehñ miøød. Hoorä, yø'ø jecyquiuhdujt, cab jaduñ pøn hoy quiudiuna'añ, paady

hijty pøn quia'a pädsøma'añ haxøøgtuum. ⁸⁻⁹ Hoorä, coo ja'a Dios ja'a Moisés ja'a wyiin jiojrp jecy yaghaanä yajtsämaamä, jaduñä Dios yajcähxø'cy coo møcmäjaa miøødä. Y coo ja'a Dios ja'a hawiinjemyiädia'agy tøø yejnä coo hajxy tøø xpiädäacäm hawa'adstuum, ja'a yhEspírituhaam ja'a Dios ja'a hawiinjemyiädia'agy tøø yecy. Jaduñä Dios maas hoy tøø yajcähxø'øgy coo møcmäjaa miøødä. Hix, hoy-yagjuøøñä ja'a Moisés ja'a wyiin jiojrp jecy yhaañ chämaamy. Maas hanaxiä ja'a hawiinjemyiädia'agy yhoy-yagjuøøñä, ja'a højts nyajwa'xypä. ¹⁰⁻¹¹ Jaduñ quiähxø'øgy coo ja'a jecyquihdujt jaduñ quia'a jaty tsoobaatnä. Ja'a hawiinjemyiädia'agy ja'a Jesucristocøxpä, je'eds jaduñ tsoobáatnäp. Y cab jaduñ mänaa tiägoyya'añ.

¹² Tøyhajt jaduñ, paady højts nga'a tsähdiuñ mänaa højts ja'a Diosmädia'agy nyajwa'xiän, ni nga'a mädsähdiuñii højts jaduñ. ¹³ Hix, haamb tsämaambä Moisés ja'a wyiin jiojrp hänajty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøoyy. Coo ja'a Moisés miädiaacpädøoyy, mänitä wit ñiyajwiinguwidsøoyy, je'eguiøxpä coo ja'a wyiin jiojrp hänajty jecy quia'a hanaannä quia'a tsämamaannä. Paady jaduñ miädsähdiuñä. Hix, yhixaambiä israelita ja'a Moisés hajxy hänajty coo ja'a Moisés ja'a wyiin jiojrp hänajty quia'a haannä quia'a tsämaamnä. ¹⁴⁻¹⁶ Pero ja'a israelitahajxy, jaançh tehñ quiuhxex hajxy hänajty, cab hajxy hänajty miädia'agywyiinjuø'oy. Høxtä chamñäbaadyñä hajxy jaduñ quiuhxexä. Coo ja'a jecyquihdujt hajxy mänaa miädoy, cab hajxy jaduñ wyiinjuø'oy, ja'a Moisés jecy miädiäacäbä. Mänit hajxy jaduñ wyiinjuø'owät coo hajxy hänajty tøø miäböcy hamuumdu'joot ja'a Jesucristocøxpä. Je'e hajxy

nWiindsøn_háj_tám. ¹⁷ Hoorä, tu'ugjuøhñdy ja'a Jesucristo yhity mөөdä Tieediä yhEspíritu. Y coo hajxy nmábójcäm ja'a Jesucristocøxpä, jaduñnä cuhdujt hajxy xmióoyyäm coo Dios hajxy nba'yáaxämd. ¹⁸ Hoorä, pøn_jaty jaduñ_h hamuumdu'joot mábøjp ja'a Jesucristocøxpä, tøø hajxy ngøxy wiinjuøyyäm coo ja'a Jesucristo miøjjä jiaančhä. Tehngajnä ja'a Jesucristo hajxy xyaghaguipxyjatiøyyäm neby je'e yhitiän. Hi_x, tu'ugjuøhñdy je'e yhity mөөdä Tieediä yhEspíritu.

4

¹ Hojioot ja'a Dios jiaančh teh_m miøød, paady højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Paady højts nga'a jootmayhaty ni mänaa. ² Nyejpy højts ja'a tøyhajt coo højts ja'a Diosmädia'agy nyajwa'xy. Cab højts jaduñ_h mänaa nhøhñda'agy. Näjuøøbiä cu'ughajxy jaduñ_h coo højts mänaa nga'a nhøhñda'agy. Xyhijxp højts ja'a Dios jaduñ_h. Ja'a häna'c-hajxy høhñdaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduñ_h yajmämädiaagøøby magämaa. Hočhähdiiunnä hajxy jaduñ_h jiatcø'øy. Pero højts, ja'a tøyhajt højts nmädiaacypy. ³ Cabä jäya'ay ja'a mädia'agy hajxy nägøxiä wyiinjuø'øy, ja'a højts jaduñ_h nyajwa'xypä ja'a Jesucristocøxpä. Paady hajxy jaduñ_h quia'a wiinjuø'øy coo hajxy haxøøgtuum wiädity. ⁴ Paadiä Diosmädia'agy hajxy quia'a mábøga'añ, tøø ja'a wyiinmahñdyhajxy piädáacäxä haxøøgtuum ja'a mõjcu'ugóngäm, ja'a yaa hanehmbä hädaa yaabä naaxwiin. Coo ja'a wyiinmahñdyhajxy tøø piädáacäxä haxøøgtuum, paadiä Diosmädia'agy hajxy hoy quia'a wiinjuø'øwa'añ maa jaduñ_h myiñän cujaay coo ja'a Jesucristo mөcmäjaa miøødä. Tu'ugmädia'agy ja'a

Jesucristo yhity mөөдä Tieedy. ⁵ Coo hөjts ja'a Dios-mädia'agy nyajwa'xy, ja'a Jesucristo hөjts nmädiaacy py coo hajxy nägөxiä nWiindsөnhajtäm. Cab hөjts jaduһny nyajcumaya'añ. Jaduһny hөjts njoot chocy coo hөjts mijts nbuhbédät, je'eguiөxpä coo hөjts ja'a Jesucristo nWiindsөnhaty. ⁶ Dios jecy mänaan coo jөөн jiájät ha-goodstuum. Cahnä ja'a naaxwiimbä hänäjty yhoy'өy. Jaaya'ay hөjts ja'a miädia'agy jaduһny tөө xyajwiinjuo'өy coo je'e mөcmäjaa miөөдä. Coo ja'a Jesucristo hajxy tөө xyajnahwaats tөө xyajcuhwáatsäm, jaduһny hajxy nyajna-juөyyäm coo ja'a Dios mөcmäjaa miөөдä.

⁷ Jaaya'ay hөjts tөө xwyiinguexy coo hөjts ja'a miä-dia'agy nyajwá'xät ja'a Jesucristocөxpä. Jaanчh tehм choobaatp ja'a miädia'agy jaduһny. Hөjts, cab hөjts mөcmäjaa nhamdsoo mөөдä. Dios hөjts jaduһny xpiuh-bejp coo hөjts ja'a miädia'agy nyajwá'xät. Coo hөjts jaduһny xpiuhbety, jaduһny yajnajuө'өy coo ja'a Dios mөcmäjaa jiaanчh tehм miөөдä. ⁸ Tөө hөjts häyohn may nmänaxy nyajnaxy, pero cab jaduһny tieһm yhanaxiä. Naxy hөjts nga'a najuө'өy neby hөjts njatc'өwät, pero cab hөjts hanaxiä njootmayhaty. ⁹ Tөө hөjts häna'c mayhooc xjia wi'i chaaçhtiuna'añ, pero cab hөjts ja'a Dios mänaa xñajtshixө'өy. Hoy hөjts häna'c mayhooc tөө xjia häyoowhixy, cab hөjts nmөjpäda'agy. Hix, homiä-naajä hөjts ja'a Dios jaduһny xcwieendähaty. ¹⁰⁻¹¹ Nebiä Jesucristo hijty mäjahñdium wiäditiän jabom-jabom, jaanä jaduһny hөjts mäjahñdium nwädijpä homiänaajä. Ja'a Jesucristocөxpä hөjts häna'c xjia wi'i yagho'oga'añ. Pero cab hөjts Jesucristo xñä'ägä nähducy. Hix, coo ja'a Jesucristo yho'cy, mänit jiuypiojtägajch. Mänit jim ñөcxy maa ja'a Tieediä wyiinduumän. Jimä mөcmäjaa jäda'ahaty miөөдänä. Paady hөjts jaduһny homiänaajä xcwieendähaty. ¹² Paady hөjts mäjahñdium nwädity

coo hõjts Diosmädia'agy nyajwa'xy. Coo ja'a Jesucristo jiugyhaty, paady hajxy xcwieendähájtäm homiánaajä.

¹³ Jaduhñ jim myiñ cujaay maa ja'a Diosmädia'aguiän coo tu'jäya'ay jecy miánaañ: “Nmábõjpiøch ja'a Diosmädia'agy, páadyhøch ja'a Dios ngapxpaady”; jaanä jaduhñ hõjts ja'a Diosmädia'agy nmábõjpä, paady hõjts ja'a Dios ngapxpaatpä. ¹⁴ Coo ja'a Dios ja'a Jesucristo yagjujyp-iøjtägajch, ja'a nWiindsønähájtäm, jaduhñ hõjts ja'a tøyhajt nmøødä coo hõjts xyagjujypiøjtägatsaambä näguipxy møød mijts. Paadiä Dios hajxy xyagjujypiøjtägatsaanäm coo hajxy nhájtäm tu'ugmädia'agy møødä Jesucristo. Mänitä Dios hajxy nägøxiä xyajnøcxäänäm jim maa ja'a wyiinduumän näguipxy møød mijts. ¹⁵ Paady hõjts häyohn nmänaxy nyajnaxy, chojpy hõjts njoot jaduhñ coo mijts ja'a Diosmädia'agy hamuumdu'joot mmábõgät cooc ja'a Jesucristo hajxy tøø xñähho'túútäm. Jaanä jaduhñ hõjts njoot chojpä coo ja'a jäya'ayhajxy maas nämay jiaac mábõgät, weenä Dios hajxy nämay ñäma'ay: “Dioscujú'uyäp”, je'eguiøxpä coo ja'a Dios hojiøot jiaançh tehñ miøødä. Y weenä Dios hajxy nämay ñämaabiä coo møcmäjaa jiaançh tehñ miøødä.

¹⁶ Nnajuøøby hõjts jaduhñ coo ja'a Dios hajxy xyagjujypiøgäänäm, paady hõjts nga'a jootmayhaty. Tehngajnä hõjts ja'a Dios møcmäjaa xjiaac mo'oy maa hõjts njuøhñdycøxpän, hoy hõjts nni'x ngopc tehngajnä jia mäjay. ¹⁷ Neby hõjts häyohn yaa nmänaxy nyajnaxiän, cab hõjts jecy nmänax nyajnaxa'añ. Y cab hõjts jaduhñ njaty tsaachpøcy. Coo hõjts jaduhñ tøø njaty tøø nhabety, paadiä Dios ja'a mayhajt møj may tiuna'añ maa hõjtscøxpän cøjxta'axiøø.

¹⁸ Pero cab hõjts jaduhñ nmøjppäda'agy coo hõjts jaduhñ yaa njaty nhabety hädaa yaabä naaxwiin. Hiç, paquiä hõjts nnä'a jaty nnä'a habety. Jim hõjts njoot nbäda'agy

maa ja'a Dios ja'a wyiinduumän. Cøjxta'axiøø hajxy jim xyaghidáañäm.

5

¹ Tsipcøxp hajxy nho'ogáañäm ndägoyyáañäm. Pero nmøødhájtäm ja'a tøyhajt hajxy jaduhñ coo ja'a Dios hajxy tøø xyajnáhdíjjäm cooc hajxy jim xyaghidáañäm maa ja'a wyiinduumän cøjxta'axiøø. Diósäts hajxy jim xyaghidáañäm, ca'a wyiingjäya'ayä hajxy jim xyaghidáañäm. ² Coo hajxy yaa ndsaaçhpójcäm hädaa yaabä naaxwiin, paadiä njoot hajxy jaduhñ tøø nbädaacäm coo hajxy jim nnøcxáañäm tsajpootyp. ³ Coo hajxy jim ngóotämd, jaançh tehñ jiootcujc hajxy jim nnijiäwø'owáañäm jim Dioswiinduum. ⁴ Mäduhñtiä hajxy yaa njaac híjtäm hädaa yaabä naaxwiin, cab hajxy jootcujc nhíjtäm je'eguiøxpä coo hajxy yaa ndsaaçhpójcäm. Pero cab hajxy ndsójcäm coo hajxy paquiä nho'c ndägóoyyämd. Je'e hajxy ndsójcäm coo njugyhájtämd cøjxta'axiøø nebiä Dios jjugyhatiän. ⁵ Ja'a Diósäts hajxy jaduhñ xyajnáhdíjjäm coo hajxy jim xyajnøcxáañäm maa ja'a wyiinduumän. Tøø ja'a yhEspíritu hajxy jaduhñ xyajnäguéjxäm coo hajxy jaduhñ xmiøødhíjtämd tu'ugmucy. Jaduhñä tøyhajt hajxy nmøødhájtäm coo ja'a Dios hajxy tøyhajt xjiaançh yagjugyhadáañäm cøjxta'axiøø neby je'e jjugyhatiän.

⁶ Paady højts jootcujc nhity jabom-jabom. Mäduhñtiä højts yaa njaac jugyhaty hädaa yaabä naaxwiin, cab højts jim ndsoj nøcxa'añ maa ja'a Jesucristo wyiinduumän. Tøyhajt jaduhñ. ⁷ Hoy højts ja'a Jesucristo yaa nga'a ja hixy hajujcy, nmäbójcäp højts ja'a miädia'agy jaduhñ. ⁸ Cab højts nnäl'ägä jootmayhaty ni weeñtiä. Chojpy højts ja'a njoot coo højts nhó'ogät, coo højts jim nnøcxät maa ja'a Jesucristo wyiinduumän. ⁹ Cab højts nmøjpäda'agy

pø ho'ogaamb højts, ó pø cab højts ndsoj ho'oga'añ. Pero chojpy højts njoot jaduñ coo højts ja'a Jesucristo miädia'agy hoy ngudiúunät. Jaduñ højts ja'a Jesucristo xquiumáyät. ¹⁰ Hiç, nägøxiä ja'a Jesucristo hajxy nøcxy nwiindäna'awáanäm. Mänit jaaya'ay ñägapxa'añ pøn hánajty hoy tøø quiudiuñ, pøn hánajty hoy tøø quia'a cudiuñ. Pønjaty hánajty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hánajty hoy tøø quia'a cudiuñ, quiumädoowaamby hajxy je'e.

¹¹ Nwiingudsähgøøby højts ja'a Jesucristo. Jia wi'i chojpy højts ja'a njoot jaduñ coo højts xquiumáyät. Nja wi'i yajmábøgaamby højts ja'a cu'ughajxy coo højts ja'a Jesucristo tøyhajt tøø xwyiinguexy. Ñajuøøbiä Dios coo højts ja'a miädia'agy hamuumdu'joot ngudiunä. Chójpiøchä njoot jaduñ coo mijts mnajuøøbiät coo højts ja'a Diosmiädia'agy hamuumdu'joot ngudiuñ. ¹² Cab højts nyajcumaya'añ, hoy højts jaduñ nja niñänømyii coo højts ja'a Jesucristo tøø xwyiinguexy. Paady højts mijts jaduñ nhawáanäm, jaduñ mijts mnajuøøwät neby højts mijts xpiuhgapxø'owät coo højts häna'c hánajty jaduñ tøø xñähwaambety. Ja'a häna'c-hajxy jaduñbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuøøy coo ja'a wyiinmahñdyhajxy quia'a nä'ägädä hoyyä. ¹³ Jaduñ højts häna'c xñänømy cooc tyijy højts nguhmäñøøy coo højts ja'a Dios ndsocy. Diósäts højts xñajuøøby coo højts nga'a cuhhiñ coo højts nga'a cuhmäñøøy. Hiç, chojpy højts ja'a njoot jaduñ coo mijts ja'a Dios ja'a hoyhajt ja'a weenhajt xmió'owät. ¹⁴ Coø højts ja'a Jesucristo xjiaanç tehñ chójcäm, paady højts ja'a miädia'agy ngudiúunäm hamuumdu'joot. Nmøød-hájtäm ja'a tøyhajt hajxy jaduñ coo jaaya'ay hajxy hoy

xñähho'túutäm nägøxiä. Xyajnähwáatsäm ja'a nbojpä ngädieeyhajtämhajxy. ¹⁵ Coo ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsøgä miädia'agy hajxy jaduhñ cudiúunäm mäduhñtiä hajxy yaa njaac jugyhajtäm. Y coo ja'a Jesucristo jiuypiojtägajch, jaduhñä tøyhajt hajxy nmøodhajtäm coo hajxy xyagijugyhadaänäm cøjxta'axiøø nebiä Tieedy jiu gyhatiän. ¹⁶ Cab højts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduhñ højts hijty nhixy nebiä pajäya'ayän. Pero cab højts jaduhñ nhixnä nebiä pajäya'ayän. ¹⁷ Hoorä, pønjaty ja'a Jesucristo tu'ugjoot tu'ugjuøhñdy møødhjñäp, hawiinjembä wiinmahñdy hajxy jaduhñ miøødhjñäp. Tøø ja'a yhaxøøgwiinmahñdy hajxy jaduhñ yhøxhijxnä.

¹⁸⁻¹⁹ Ja'a Dios jaduhñ mänaañ coo hawiinjembä wiinmahñdy hajxy nmøødhajtämd. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädieey hajxy xyajnähwáatsäm. Jaduhñ hajxy xmiøødnijioot-paatäm. Y højts jaduhñ tøø xwyiinguexy coo højts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajnähwáatsäm, y coo ja'a Dios hajxy jaduhñ xmiøødnijioot-paadäänäm. ²⁰ Ja'a Dios højts tøø xwyiinguexy coo højts ja'a Jesucristo miädia'agy nyajwá'xät. Jaduhñ højts tøø xñäma'ay coo højts mijts nmänuu'xtá'agät coo miädia'agy hajxy mmäbójcät. Jaduhñä Dios hajxy xyajnähwá'adsät. Jaduhñ hajxy ween xmiøødnijiootpaadøøjät. ²¹ Cabä Jesucristo ja'a Dios mänaa miägädiehy. Pero coo Dios hajxy xjiaanç tehñ chójcäm, paady miänaañ coo ja'a Jesucristo ja'a nbojpä ngädieeyhajxy xchømó'cämd. Y coo ja'a Jesucristo hajxy xñähho'túutäm, jaduhñä Dios hajxy xyajnähwáatsäm. Jaduhñ hajxy xpiädáacäm hawa'adstuum.

6

¹ Tøø ja'a Diosmädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmio'oy. Højts mijts nmänuu'xtaacy py coo ja'a Diosmädia'agy hajxy hoy mgudiúnät. Paady mijts jaduħn nmänuu'xta'agy, coo højts ja'a Dios nmøøduñ. ² Hiħ, jaduħn jim myiñ cujaay maa ja'a Diosmädia'aguiän:

Tøøch nyajnáhdijy mänáajøch miich ja'a hoyhajt ja'a weenhajt hawiinmats nmó'owät.

Cooch miich mänit xpia'yá'axät, mänitøch miich nmädówät. Mänit nbuhbédät. Mänit nyajnáhwa'ads nyajcuhwá'adsät,

nømä Diosmädia'agy miána'añ. Hoorä, tøø yhabaatnä coo ja'a Dios hajxy nba'yáaxämd. Jaduħnä Dios hajxy xyajnáhwaats xyajcuhwáatsämd.

³ Maa højts ja'a Diostuung nduñän, hoy højts njäya'ayhaty. Hiħ, cab højts ndsocy coo højts pøn xñähwaambédät. ⁴ Hoy højts ja'a Diostuung njaanč tuñ. Nmee'xtujpy højts hoy tyijä, hoy ñejpiä højts nja jaty nja habety. Hanaxiä højts tøø ndsaächpøcy. Tøø højts häyohn mayhooc nmänaxy nyajnaxy. ⁵ Tøø højts mayhooc nyajwobho'ogy. Tøø højts mayhooc nyajtsumy. Tøø højts ja'a cu'ug mayhooc xñäbädøgy. Tøø højts mayhooc nhanuu'xø'oy ja'a Diosmädia'agyquiøxpä. Tøø højts jamia'ay nhity mayhooc ja'a Diosmädia'agyquiøxpä. Tøø højts mayhooc jaguiay jayhu'ugy nhijpä. ⁶ Coo højts ja'a Diostuung nduñ, cab højts haxøøgwinnmahñdy nnä'ägä møødä. Nwiinjuøøby højts ja'a Diosmädia'agy. Mee'xxieemy højts nhity, cab højts tii nmøjpdä'agy. Hojioot højts nmøød. Hiħ, ja'a Dioshəspiritu højts nmøød. Hamuumdu'joot højts jäya'ay jaduħn ndsocy nba'häyoy. ⁷ Nyajwa'xyp højts ja'a tøyhajt. Ja'a Diosmäjaa højts nmøød. Jaanč tehñ yhoy højts njäya'ayhaty nebiä

Dios choquiän. Jaduhñ højts ja'a haxøøgpä nga'a ya-jmäjäda'agy. ⁸ Näje'eyyä højts jäya'ay jaduhñ xwyiin-gudsähgø'oy. Näje'e højts xquia'a tsocy xquia'a mee'xy. Näje'e højts xquiumay, näje'e højts xñähojy. Tømiädiacp højts, hoy højts jäya'ay näje'e xjia nänømy cooc tyjy højts nhøhñda'agy. ⁹ Hoy højts ja'a tsaangu'ug xjia hixyhaty, cab højts häna'c näje'e xmiämøj xmiämäyø'oy. Mäjahñdiuum højts njaančh tehñ wiädity, høxtä xyagho'ogaamb højts jäya'ay. Pero ja'a Dios højts jaduhñ xcwieendhajp. Tøø højts ja'a Dios xyajcumädoy, pero cabä Dios jaduhñ miäna'añ coo højts nhó'ogät. ¹⁰ Jootcujc højts nnä'ägä hity homiänaajä, hoy højts wiingumänaajaty nja mänaxy nja yajnaxy. Hoy højts nja häyoy, nyajnahixøøby højts ja'a jäya'ay ja'a Diosmädia'agy nämäy, jaduhñä hoyhajt ja'a weenhajt hajxy piáadät. Hoy højts tii nga'a ja møødä, Dios højts xmiooby tijaty højts nyajmaajajpy.

¹¹ Mägu'ughajpädøjc, ja'a mijts jim hijpä Corintos, mijts jaduhñ nmägapxyp. Tøø mijts ngøxy hawáañäm nebiaty højts ja'a mädia'agy nmøødä. Njaančh tehñ chojpy højts mijts jaduhñ. ¹² Nja wi'i miøødnijootpaadäänäp højts mijts. Cab højts nnajuø'oy pø jaduhñ mijts xjiäwøøbiä. ¹³ Tunä mayhajt hajxy, tsøc hajxy nijootpáatäm. Jaduhñ mijts nmägapxy nebiä huungän.

¹⁴ Cab hajxy mmøødwädiymúgät pøn ja'a Diosmädi-a'agy ca'a mæbøjp, coo hajxy jaduhñ mnä'a pahíjxpät neby hajxy yhaxøøgwäditiän. Hix, pønjaty ja'a Diosmädia'agy mæbøjp, hoy hajxy quiuidiñ. Hawa'adstuum hajxy je'e. Pero pønjaty ca'a mæbøjp, cab hajxy quiuidi-ñ. Wiing ja'a wyiinmahñdyhajxy. Haxøøgtuum hajxy je'ebä. ¹⁵ Hix, cabä Jesucristo tu'ugmädia'agy yhity møødä møjcu'ugong. Jaaná jäduhñduhmbä, pøn ja'a Diosmädia'agy mæbøjp, cab hajxy tu'ugmädia'agy yhijpä møød ja'a Diosmädia'agy hajxy ca'a mæbøjpä. ¹⁶ Cabä

cuhdujt jaduhñ myiñ coo häna'c quepychech naaxpoch hajxy wyiingudsähgø'owät maa ja'a Diostøjcän. Cabä quepychech naaxpoch jiujuquiä. Ja'a Diósäts mäbøcy jujcy. Y coo ja'a Diosmädia'agy hajxy nmäbøjcäm, jaduhñ mäwiin hajxy nmäbáatäm nebiä Diostøjcän, je'eguiøxpä coo ja'a Dioshespíritu hajxy nmøødhájtäm. Jaduhñä Dios jecy miänaañ:

Pønjátyhøchä nmädia'agy xmiøbøjcäp, je'eçhä nhEspíritu nmo'owaamby. Nwoowhidáambiøch hajxy je'e.

Xwyiingudsähgø'owáambiøch hajxy je'e.
Ngu'ughadáambiøch hajxy je'e,

nømä Dios hajxy jecy xmiädiáacäm. ¹⁷ Jaduhñä Dios jecy miänaambä:

Puhwaatsnä hajxy ja'a häna'c ja'a quepychech hajxy wiingudsähgøøbiä, ja'a häna'c ja'a naaxpoch hajxy wiingudsähgøøbiä.

Cab hajxy mmøødwädijmúnät. Høxhix ja'a haxøøgpä hajxy. Mänitøch mijts xquiø'ødägøñät.

¹⁸ XTieedyhadáambiøch mijts hánajtiän. Nnøøx-hadáambiøch nmajc-hadáambiøch mijts hánajtiän,

nømä Dios jecy miänaañ. Møccuhdujt ja'a Dios miøød. Hoy piønä jaduhñ yhane'emy.

7

¹ Mägu'ughajpädøjc, tøyhajt jaduhñ coo ja'a Dios hajxy xyhuunghájtäm. Tsøcxä haxøøgwiinmahñdy hajxy najtshixøøyyäm cøxiä. Yø'ø haxøøgwiinmahñdy, xyajmä'täp ja'a mni'x ja'a mjuøhñdy jaduhñ. Tsøgå Dios hajxy wiingudsähgøøyyäm. Tsøgå njoot hajxy pädáacäm maa ja'a Dioscøxpän.

² Cham højts mijts nnämäaguiumbä, tuñä mayhajt hajxy, tsøc hajxy nijiootpáatäm. Cab højts pøn tøø

nhäyoowhixy, cab hõjts põn haxøøgwiiinmahñdy tøø nya-jnähixø'øy, cab hõjts põn tøø nwiinhøøñ. ³ Pero cáboch nmána'añ cooçh põn tøø xñähøøñø'øy. Njaançh tehñ chojpy hõjts mijts jaduñ mädühñtiä hajxy yaa njaac jugyhajtäm hädaa yaabä naaxwiin. Jaduhñ mijts hijty tøø nhuuc nämaabiä. ⁴ Nnajuøøbiøch coo mijts ca'xy mgudiuna'añ waambátyhøch mijts tøø nmägapxy tøø nhane'emy. Ngumáabiøch mijts jaduñ. Jootcújc-høch njaançh tehñ ñijiäwø'øyii maa mijtscoxpan. Jaançh tehñ xioondáacpøch, hoy hõjts madiu'u nja tsaaçhpøcy.

⁵ Coo hõjts ja'a hermano Tito jim nga'a paaty maa ja'a cajpt jaduñ xiøhatiän Troas, paady hõjts jim nwi-imbijty. Y coo hõjts yaa nmejch Macedonia-naaxooty, ni yaa hõjts ja'a hermano Tito nga'a paatpä. Coo hõjts yaa nga'a tsoj paaty, paady hõjts hijty jootcujc nga'a nä'ägädä niijiäwø'øyii. Xmiädsiphajp hõjts jäya'ayhajxy hijty ja'a Diosmädia'agyquiøxpä. Jootmayhajp hõjts hijty je'eguiøxpä cooc tyijy mijts jaduñ mga'a mäbøga'añ. ⁶ Ja'a Dios, yagjootmøcpøjpy je'e pønjaty jaduñ jootmayhajp. Y coo ja'a hermano Tito jiaançh mejch, mänit hõjts ja'a Dios xyagjootmøcpøjcy. ⁷ Xjiaançh tehñ yagjootmøcpøjc hõjts ja'a Dios jaduñ coo hõjts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx hõjts xyhawaanä cóogøch mijts xjia wi'i jiøbhixy cooçh jim nnøcxät maa mijtsän. Jaduhñ hõjts tøø xyhawáanäbä cooc mijts mjootmayhaty je'eguiøxpä cooçh mijts hijty tøø xyhuuc yagjootmayhajpä. Y jaduñ hõjts tøø xyhawáanäbä cóogøch mijts xjiaançh tehñ jahmiejtsta'agy. Coo hõjts jaduñ tøø xquiøxy hawaanä, páadyhøch njaançh tehñ xioonda'agy.

⁸ Mänáajøch mijts ja'a nocy jawyiinhajtpä nyajnäguexiän, nhójjøch mijts jaduñ siémpräm. Paady hajxy weeñtiä mjootmayhajty. Jootmayhájthøch høøch

wéeñtiäbä coo mijts nhojy. ⁹ Coo mijts nhojy, paadiä mhaxøøgcuhdujt hajxy mhøxhijxy. Xquiumaaxy mijts ja'a Dios jaduñ coo hajxy jaduñ mhøxhijxy. Coo hajxy jaduñ mhøxhijxy, páadyhöch nxoonda'agy, ca'a jie'eguiøxpä coo hajxy mjootmayhajty. ¹⁰ Pønjaty yhaxøøgcuhdujt høxhijxp, je'edshajxy hodium mähmó'owäp. Cumay hajxy jaduñ piädsómät maa ja'a Diosän. Y cab hajxy jaduñ jiootmayhánät. Pero pønjaty yhaxøøgcuhdujt ca'a høxhijxp, haxøøgtuum hajxy miähmó'owät. Hoy miänaaxøø hajxy jaduñ jiootmayhada'añ. ¹¹ Pero mijts, hamuumdu'joot hajxy mgudiuñ nebiaty mijts tøø nmägapxy tøø nhane'emiän mänáajøch ja'a jayøbajtpä nocy nguexiän. Mjaanč høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduñ coo hajxy hijty tøø mgädieey. Y mdsähgøøyy hajxy jaduñ weeñtiä. Choippy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän. ¹² Paady højts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxphajtiä højts yø'ø nocy nguejxy. Paady højts nguejxpä, choippy højts ja'a njoot hánajty coo hajxy myajcähxø'ögät coo højts mijts xchocyñä. Xyhijxp højts ja'a Dios jaduñ coo højts nga'a høhnda'agy. ¹³ Coo højts mijts jaduñ xchocyñä, paady højts nxoonda'agy.

¹⁴ Xoondaacp højts jaduñbä coo ja'a hermano Tito xioondaacpä. Paady xioonda'agy coo ja'a Diosmädia'agy hajxy hánajty hoy mbanøcxyñä nägøxiä mänaa jim yhi-tiän maa mijtsän. Tøøchä hermano Tito hijty nnäma'ay coo mijts ja'a Diosmädia'agy hoy mgudiuñ. Y tøyhajt hajxy mjaanč cudiuñ. ¹⁵ Hamuumdu'joot mijts ja'a hermano Tito xjiaanč tehñ chocy, je'eguiøxpä coo mijts

ja'a miädia'agy mmäbøjcä hamuumdu'joot nebiaty mijts xyhanehmiän. ¹⁶ Nnajuóøbiøch coo mijts ja'a Diosmädi-a'agy hoy mbanøcxaannä; páadyhøch nxoonnda'agy.

8

¹ Hoorä, mägu'ughajpädøjc, cham højts mijts nya-jmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsänaabiä Macedonia-naaxooty. ² Jaanč tehñ xioonndaacp hajxy, hoy hajxy jaduñ tøø jia tsaächpøcy hoyhoy, hoy hajxy jaduñ jia häyoy hanaxiä. Coo hajxy jaduñ jiaanč tehñ xioonnda'agy, paadiä xädø'øñ hajxy may tøø yajmucy. Hojiot hajxy jiaanč tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduñ tøø yecy. ³ Hamuumdu'joot hajxy jaduñ tøø yecy, ca'a yhadsipä, ca'a yhajootma'adä. Tøøch nhamdsoo hixy coo hojiot hajxy jaduñ jiaanč tehñ miøødä. Høxtä yejnajxypä xiädø'øñ hajxy jaduñ näjootpä. ⁴ Coo hajxy miädoyhajty coo højts ja'a häyoobäjäya'ay hänajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit højts xñämaayy coogä xädø'øñ hajxy jaduñ quiexaambä, ja'a hajxy jim tsänaabiä Macedonia. Hamuumdu'jootäc hajxy jaduñ quiexa'añ. ⁵ Xoonndaac højts jaduñ coo ja'a hermanodøjc xädø'øñ hajxy may yejcy, ja'a hajxy jim tsänaabiä Macedonia. Y coo hajxy miänaañ coo ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoondaacy. Dios jaduñ mänaañ coo hajxy jaduñ quiudiünät. Jaduñ hajxy miänaambä cooc højts ja'a nmädia'agy hajxy xquiudiunáañäbä. ⁶ Mänaa ja'a hermano Tito jim jayøbajt yhoyän maa mijtsän, mänit hajxy xñämaayy coo xädø'øñ hajxy myajmúgät. Hoorä,

jim hõjts ja'a hermano Tito nguejxtägatsaambä maa mi-jtsän, weenä xädø'õñ hajxy mgøxy yajmucy. Mänit hajxy jim mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä. ⁷ Jaančh tehṁ yhoy ja'a Diosmädia'agy hajxy mmäbøcy. Jaančh tehṁ yhoy hajxy myajwiingapxø'øy. Jaančh tehṁ yhoy hajxy mwiinjuø'øy. Hamuumdu'joot hajxy jaduhṅ mmäbøcy. Xjiaančh tehṁ chojpy hõjts mijts. Hoorä, chojpy hõjts ja'a njoot coo mijts ja'a häyoobäjäya'ay mjaančh tehṁ piuhbédät hamuum-du'joot xädø'õñhaam.

⁸ Cábøch mijts ndehṁ yhane'emy coo hajxy mbuh-bédät. Paady mijts jaduhṅ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduhṅ mbahíjxpät. Jaduhṅ hajxy myajcähxó'øgät coo hajxy tøyhajt mjaančh mädsøjpä. ⁹ Tøyhajt jaduhṅ coo ja'a Je-sucristo hojiot jiaančh tehṁ miøødä, ja'a nWiindsønha-jtämhajxy. Cahnä hänajty yaa quiäda'agyñä hädaa yaabä naaxwiin nebiä pajäya'ayän, jim hijty møc yhane'emy maa ja'a Tieedy ja'a wyiinduumän. Pero coo yaa quiä-daacy, mänit jaduhṅ jiajty nebiä hädaa yaabä jäya'ayha-jxiän, neby hajxy yaa nhäyóowäm. Jaduhṅ hajxy hoy xñähho'túutäm. Y coo hajxy jaduhṅ tøø xñähho'túutäm, paady hajxy jim xyajnøcxáanäm maa ja'a Tieediä wyiin-duumän, pønjatiä miädia'agy jaduhṅ mäbøjcäp.

¹⁰⁻¹² Cham mijts nwiingapx njøjcapxø'owa'añ coo ja'a xädø'õñ hajxy myajpedøød neby hajxy hadøjumøjt mwi-inmahñdyhajtjän coo hajxy hänajty myajmuga'añ. Mja nähmajts hajxy jaduhṅ, pero cahnä hajxy myajpedyii. Hahixøøby jaduhṅ coo hajxy myajpedøød, jaduhṅ ha-jxy myajcähxó'øgät coo hojiot hajxy tøyhajt mjaančh møødä. Mijts jaduhṅ mwiinmahñdyhajtsohṅ coo xädø'õñ hajxy hänajty myajmuga'añ. Jaduhṅ hajxy myégät neby hajxy mmäjäda'aga'añ. Mädyyyä jaduhṅ. Cab jaduhṅ

yhahixø'oy coo hajxy hanaxiä myégät. Hix, jaduñä Dios ja'a jioot chocy coo hajxy myajcähxø'ogät coo hojioot hajxy jaduñ mjaanč møødä.

¹³ Cábøch nmäna'añ coo hajxy mhäyoodägø'øwät, páadyhöch tøø nmäna'añ coo hajxy hanaxiä mga'a yégät.

¹⁴ Jadúñhøchä njoot chocy coo pøn tii quia'a yajmaa-jiädät. Jaduhñds je'e, hahixøby jaduñ coo mijts ja'a häyoobäjäya'ay mbuhbédät, je'eguiøxpä coo mijts nä'ä tægø'øbä mmøødä jäda'ahaty. Y coo mijts hänäjty tøø mhäyoodägø'oy, mänit mijts xpiuhbejtägätsät, pø jim hajxy hänäjty miøødä nä'ä tægø'øbä. ¹⁵ Jaduhñ jim myiñ cujaay maa ja'a Diosmädia'aguiän: “Pønjaty may yajpädø'c, piuhmooyy hajxy je'e pønjaty weeñtiä yajpädø'c. Yaghaguipxyatiøøyy hajxy jaduñ tu'cuhtujt.”

¹⁶ Dios ja'a hermano Tito jaduñ tøø yajnähdijy coo hojioot miøødhädät maa mijtsøxpä, neby højts hojioot nmøødän maa mijtsøxpän. Dioscujú'uyäp ja'a Dios jaduñ. ¹⁷ Coø højts ja'a hermano Tito nnämaayy coo jim ñøcxät maa mijtsän, jootcugøøyy je'e coo højts jaduñ nnämaayy coo jim ñøcxät. Hix, hamdsoojoot hijty jaduñ ñälägä nøcxa'añ.

¹⁸ Nyajmäguexø'øwaamby højts ja'a hermano Tito ja'a mägu'ughajpä wiingpä. Wiinduhmčhajtøjc tøø yajmä-doyhaty coo ja'a Diosmädia'agy hoy yajwa'xy ja'a Jesucristocøxpä. ¹⁹ Jaduhñä mäbøjpädøjc-hajxy tøø miä-naambä coo højts nmødhädät majaty højts ja'a xädø'øñ nyajmucy mänaa højts ja'a häyoobäjäya'ayhajxy hänäjty nøcxy nmo'owa'añän. Cähxø'øgaamb jaduñ coo ja'a Dios miøjjä jiaančhä. Jaduhñ quiähxø'øgaambä coo højts hojioot nmøødä. ²⁰ Paady højts nämetsc nädägøøg nwädity xädø'øñyajmujpä, cab højts ndsocy coo højts pøn xñänómät cooc tyijy højts nje'ehada'añ. Hix, majiaty højts xädø'øñ nyajmucy. ²¹ Chojpy højts ja'a njoot jaduñ

coo hõjts ja'a jäya'ayhajxy xquiumáyät neby hõjts ja'a Dios xquiumáyyän.

²² Chaads hõjts ja'a mägu'ughajpä mäwiingpä nguexáangumbä mөөдä hermano Titohajxy. Mayhooc hõjts hoy tөө xmiөөдтуñ hoy ñä'a mädyii tuungä. Hamuumdu'joot jim ñөcxa'añ maa mijtsän. Hix, ñajuөөby jaduhñ coo mijts hoy myajtөjtägө'өwa'añ. ²³ Naxiä hermano Tito hajxy hoy mdehm yajtөjtägө'өwät coo hajxy jim miédsät. Haa ja'a hermano Tito, hoy miänáajөch jaduhñ xñä'ägä mөөдтуñ, páadyhöch jim nguexa'añ maa mijtsän. Y ja'a jiamiөөdhajxy nämetspä, ja'a mäbөjpädөjc-hajxy yaabä, jaduhñ hajxy tөө miänaambä coo hajxy jim ñөcxät. Hoyyä Jesucristo hajxy wyiingudsähgө'өy. ²⁴ Coo mijts ja'a hermano Tito hoy myajtөjtägө'өwät mөөдä jiamiөөdhajxy, jaduhñ mijts ja'a mäbөjpädөjc hajxy xyhixät coo hajxy tөyhajt mjaanč mädsocy. Tөjiädäp jaduhñ neby hõjts mijts tөө nmädia'aguiän coo mijts hojioot mjaanč tehñ miөөдä.

9

¹ Hөөч mijts jaduhñ nnä'a jaac näjaayөөby. Nnajuөөbiөch jaduhñ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mäbөjpä. ² Hix, nnajuөөbiөch coo hajxy hamuumdu'joot mbuhbeda'añ. Jaduhñhöchä mäbөjpädөjc-hajxy tөө nhawaanä, ja'a hajxy jim tsänaabiä Macedonia-naaxooty. Jaduhñhöch hajxy tөө nhawaanä coo mijts hadojumөjt mdägөөyy xädө'өñyajmujpä, pөnjatiä Diosmädia'agy jim mäbөjp Acaya-naaxooty. Y coo mijts jayөjp mnähmajch, paadiä Macedóniabä jäya'ayhajxy nämay xpiahixaambä. Jaduhñ hajxy hamuumdu'joot miäbuhbedaambä nej mijts mmäbuhbeda'añän hamuumdu'joot. ³ Páadyhöchä hermano Titohajxy jim nguejxө'өгa'añ maa mijtsän,

weenä xädø'øñ hajxy paquiä myajmujpädø'øy. Jaduhñds je'e, cooçh jim̄ nnócxät, tøø ja'a xädø'øñ hajxy hänäjty mgøxy yajmujnä. Haa ca'a, tøøçhä Macedoniabähajxy nhawaanä coo mijts ja'a xädø'øñ myajmuga'añä. ⁴ Hiç, wéhñdøçhä Macedóniabä jäya'ayhajxy näje'e nmødhádät jim̄ maa mijtsän. Y coo hajxy jaduñ xyhíxät coo ja'a xädø'øñ hajxy hänäjty mga'a cøxy yajmucyñä, mdsähdiunaamb hajxy jaduñ. Jadúhñhøch ndsähdiúumbät je'eguiøxpä cooçh mijts tøø nmädia'agy coo ja'a xädø'øñ hajxy hänäjty myajmuga'añ. ⁵ Páadyhøch jaduñ nwiinmaayy coo hijty yhahixø'øy cooçhä hermano Titohajxy jawyiin nguejxø'øgät maa mijtsän, jaduñ mijts jim̄ xpiuhbédät maa ja'a xädø'øñ hajxy myajmuquiän. Jaduhñä xädø'øñ hajxy myaghídät nähix̄ hahixø'ø cooçh jim̄ nmédsät, neby hajxy jaduñ tøø mmäna'añän coo hajxy myaghida'añ. Jaduhñ hajxy myajcähxø'øgät coo ja'a xädø'øñ hajxy myega'añ hojiootcøxpä. Cab pøn̄ jaduñ miäná'anät cooc tyijy mijts hadsip̄ tøø nhane'emy coo hajxy myégät.

⁶ Jaduhñds je'e, pøn̄jaty jaduñ wiinduc wiindsaaçh, cabä hoyhajt hajxy piaada'añ. Pero pøn̄jatiä häyoobäjäya'ay näxuu'tsp, je'edsä hoyhajt hajxy jaduñ paadaamb. Tøyhajt jaduñ. ⁷ Jootcujc hajxy myégät hamuumdu'joot neby hajxy hänäjty myega'añän, ca'a yhadsipä ca'a yhajootma'adä, ca'a hajxy tii mnajtshäy-owø'øy. Hiç, je'e ja'a Dios chojpy pøn̄jaty jaduñ jootcujc yejp. ⁸ Møj jaançhä Dios. Xmió'owäp mijts ja'a hoyhajt ja'a weenhajt møj may, jaduñ hajxy tii mga'a yajmaa-jiádät ni mänaa. Nä'a tægø'øbä hajxy jaduñ xmió'owät, jaduñä wiingjäya'ay hajxy hoy mbuhbejtägätsät hoy ñe-jiä. ⁹ Jaduhñ jim̄ myiñ̄ cujaay maa ja'a Diosmädia'aguiän: Pøn̄ hojiäya'ay, møj mayyä häyoobäjäya'ay piuhbety. Hoy miänaaxøø ja'a Dios jaduñ piuhbejtägatsa'añ.

¹⁰ Ja'a Dios, jejpy je'e ja'a tømmd mädyii mní'ibäp, mädyii mdúnäp. Yajmayøøby jaduhñ nebiä mgáyät nebiä mhú'ugät. Jaaná jäduhñduhm̄bä, xmió'owäp mijts ja'a Dios nä'ä tægø'øbä tijaty hajxy hñanjty myajmaa-jiajpy, jaduhñ mijts ja'a häyoobäjäya'ay mmoodiägát-sät. ¹¹ Y coo mijts ja'a häyoobäjäya'ay jaduhñ hamuum-du'joot mbuhbédät, mänit mijts ja'a Dios ja'a hoyhajt ja'a weenhajt mõj may xmió'owät. Y coo højts ja'a häyoobäjäya'ay xädø'øñ nøcxy nmo'oy, ja'a mijts hñanjty tøø myéquiäbä, mänitä häyoobäjäya'ay ja'a Dios hajxy ñäma'awa'añ: “Dioscujú'uyäp.” ¹² Hiḡ, coo mijts ja'a häyoobäjäya'ay jaduhñ mbuhbédät, mejtstu'u ja'a hoybä hajxy jaduhñ mduna'añ. Piaadaambiä häyoobäjäya'ay-hajxy tijaty hajxy hñanjty yajmaajiajpy, y tehñgajnä ja'a Dios hajxy jaduhñ ñäma'awa'añ: “Dioscujú'uyäp.” ¹³ Coo mijts ja'a häyoobäjäya'ay jaduhñ mbuhbédät jootcuyc hoy miädyii cajptä, myajcähxø'øgaamby hajxy jaduhñ coo ja'a Dios ja'a miädia'agy hajxy mgudiuunä ja'a Jesucristocøxpä. Jaduhñä häyoobäjäya'ay ja'a Dios hajxy mõj jaančh ñäma'awa'añ, je'eguiøxpä coo mijts ja'a Dios ja'a miädia'agy mgudiuunä, møød coo hojioot hajxy mjaančh tehñ miøødä ja'a häyoobäjäya'aguiøxpähajxy. ¹⁴ Coo mijts ja'a Dios ja'a hoyhajt ja'a weenhajt mõj may tøø xmió'oy, paady mijts ja'a häyoobäjäya'ay xchoga'añ xpi-a'häyowa'añ, møødä Dios hajxy pia'ya'axa'añ ja'a mitscøxpä. ¹⁵ Tsøcxä ja'a Dios hajxy nägøxiä nämáayyäm: “Dioscujú'uyäp”, je'eguiøxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túutäm. Møjmayhajt ja'a Dios jaduhñ tiuun hoy-yagjuøøñä.

10

¹ Høøch mijts chamñ nmägäpaxaamby nhane'emaamby, høøch Pablohajpä. Mänaa ja'a Jesucristo yaa wiäditiän hä-

daa yaabä naaxwiin, jaanč tehṃ miøødä hojioot hānajtj. Mee'xxieemy hānajtj jiaanč tehṃ wiädity. Jadúhñhøch je'e nja pahixaañ coočh mijts jaduñṃ nmägapxa'añ nhane'ema'añ. Ja'a nmädsiphøchhajxy, jadúhñhøch hajxy xñänømy cooc tyijy mijts hānajtj tsähgø'ø tsähgø'ø nmägapxy nhane'emy mänáajøch jimṃ nhitiän maa mi-jtsän, pero cooc tyijy høøčh nga'a tsähgøøñä coo mijts nmägapxy nhane'emy nocyhaam. Cab jaduñṃ tiøyyä, nä'ä høhñdaacp hajxy jaduñṃ. ² Mägu'ughajpädøjc, huuc tuñä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduñṃ mhøxhixät, cab mijts jimṃ waamb nnäma'awät coočh jimṃ nnøcxät maa mijtsän. Pero pøn jaduñṃ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'ečh mähøcy hajxy nhójäp hajäya'ayhaam. Nyajcähxø'øgäbøch jaduñṃ coočh hānajtj tøyhajt nga'a tsähgø'øy. ³⁻⁴ Hoy højts yaa nja tsäna'ay hädaa yaabä naaxwiin, cab højts ja'a nhamdsoo wiinmahñdy nyajtuñṃ nebiä yaabä jäya'ayhajxy yajtuñṃän. Ja'a Dios højts xpi-uhbejp ja'a miäjaahaam, cab højts ja'a Dios ja'a miädsip jaduñṃ nyajmäjädaacä. ⁵ Jii jäya'ayhajxy näje'e wiädity, yajcumayaamb hajxy, høhñdaacp hajxy. Cabä jiioothajxy yajmädsocy coo wiinghäna'c ja'a Dios hajxy pia'häyówät. Nyajcähxø'py højts jaduñṃ coo yø'ø häna'c-hajxy jaduñṃ yhøhñda'agy. Y coo højts hānajtj tøø nga'a yajmäjäda'agy, mänit højts nyajmäbøga'añ ja'a Jesucristocøxpä, coo ja'a miädia'agy hajxy ween quiudiuñṃä. ⁶ Y coo mijts hānajtj hoy tøø mgudiuñṃ, cab højts mijts hānajtj waamb nnäma'awaanñä. Pero pønjatj jaduñṃ ca'a nä'ägädä cudiunaamb, je'eds højts hahoy nhøxquexaambby maa ja'a tsajtøjcän.

⁷ Pønjatj jaduñṃ najuøøby coo hajxy tøø wyiinguexyii ja'a Jesucristäm, ween hajxy ñajuøøbiä coočh ja'a Jesu-

cristo tøø xwyiinguejxpä. Tøyhajt jaduñ. Hoy piønä jaduñ ñajuø'øy. ⁸ Ja'a Jesucristo højts ja'a cuhdujt jaduñ tøø xmio'oy coo højts mijts nmägapx nhané'emät. Chojpiä jioot jaduñ coo mijts ja'a miädia'agy mjaac mábójcät. Cabä jioot chocy coo hajxy mdudägóyyät. Tøyhajt jaduñ coočhä Jesucristo ja'a cuhdujt jaduñ mbä tøø xmio'oy. Coočh jaduñ nniñänømyii, cábøch ndsähdiuna'añ, hóyhøch häna'c jaduñ xjia nänømy cóogøch tyijy nyajcumaya'añ hanaxiä. ⁹ Cábøch mijts nhadsähgø'øwa'añ, hoy mijts nocy naxy nja yajnäguexy. ¹⁰ Ja'a nmädsiphøchhajxy, jaduñ hajxy miäna'añ cooc tyijy mijts møc nhane'emy nocyhaam. Pero jaduñ hajxy miänaambä cooc tyijy hānajt møc nga'a hane'emy mänáagøch jim nhitiän maa mijtsän, cooc tyijy hānajt weenjaty ndsähgø'øy. ¹¹ Pero pønjaty jaduñ mänaamb, cabä tøyhajt hajxy miøødä. Jaduhñdsä tøyhajtpä, neby højts mijts møc nhane'emiän nocyhaam, jaanä jaduñ mijts møc nhane'emaambä coo højts jim nnøcxtägätsät maa mijtsän.

¹² Jii häna'c-hajxy näje'e, jaančh tehñ yajcumayaamb hajxy cooc tyijy hajxy jiaančh tehñ jiaty jiaančh tehñ ñajuø'øy. Hamiñ haxøpy hajxy jaduñ ñiguiumayii. Y cabä wiinghäna'c hajxy quiumay. Pero cabä tøyhajt hajxy miøødä. Højts, cab højts jaduñ nhäna'c-haty. Cab højts jaduñ niguiumayii. ¹³ Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajnähdijjiän coo højts ndúnät. Jaduhñ højts tøø xyajnähdijy coo højts jim ndúnät høxtä jimbaady maa mijtsän. ¹⁴ Coo højts jim nduñ maa mijtsän, ngudiuumby højts jaduñ neby højts ja'a Dios tøø xñäma'ayän. Hiç, højts ja'a Diosmädia'agy jim nyajwa'xtsohñ maa mijtsän, ja'a Jesucristocøxpä. ¹⁵ Majaty wiinghäna'c jaduñ tøø tiuundsooñän, cab højts jaduñ nmäna'añ coo højts jim

tøø nduñ. Cab højts jaduñ nguñdujthaty. Pero chojpy højts ja'a njoot coo mijts ja'a Diosmädia'agy maas hoy mmäbögät, jaduñ højts maas hoy njaac tehñ tiúnät maa mijtsän. ¹⁶ Y jaduñ højts ja'a Diosmädia'agy hoy nya-jwá'xät jäguembaady maa pøn ja'a Diosmädia'agy quia'a mädoynän. Hiñ, cab højts nduna'añ maa wiinghäna'c jaduñ tøø tiuundsooñän. Hiñ, cab højts jaduñ nya-jcumaya'añ.

¹⁷ Jaduñ jim myiñ cujaay maa ja'a Diosmädia'aguiän: “Cab jaduñ yhähixø'øy coo hamdsoo mniguiumayøøjät. Pero jaduñ yhähixø'øy coo ja'a Dios hajxy møj jaančh mnänómät.” ¹⁸ Je'eduhñ tsoobaatp coo ja'a Dios jaduñ xquiümáyät. Cab jaduñ choobaady coo hamdsoo mniguiumayøøjät.

11

¹ Huuc tunä mayhajt hajxy, huuc mee'x hajxy weeñtiä. Chámhöch weeñtiä nhuuc mädia'aga'añ nebiä jäya'ay-hajxy yajcumayaambän. Coočh jaduñ weeñtiä nniguiumayii, jaduñ yajmädooy nebiä cuhhiimbähajxy miädi-a'aguiän. ² Nej mijts ja'a Dios xchoquiän, jaduhñhöch mijts ndsojpä, je'eguiøxpä coočh mijts ja'a Diosmädia'agy tøø nyajmäböcy ja'a Jesucristocøxpä. Chójpiøchä njoot jaduñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät. ³ Mnigwieendähadøøjäp hajxy, jaduñ hajxy pøn xquia'a jøjcapxø'øwät, coo hajxy xyagiahdiägöyyät ja'a Jesucristo. Jii häna'c-hajxy näje'e wiädity mäwi-inhøñbä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduñ xwyiinhøñnät. Haa ca'a, jaduñä Eva jecy yhuuc wiinhøñbä ja'a møjcu'ugóngäm mänaa ja'a møjcu'ugong

ñibiäda'agyiijän nebiä tshãñdiän. Siémprämä mõjcu'u-gong quiuwiinmahñdiä. Paquiä ja'a Eva yajwiinhøhñ. ⁴ Paquiä mijts ja'a miädia'agyhajxy jaduhñ mmäbøjcä'cä pønjaty mijts jaduhñ wiing xyajñähixøøby ja'a Jesucristocøxpä. Cab hajxy jaduhñ yajñähixø'øy neby højts ja'a Diosmädia'agy nyajñähixø'øyän ja'a Jesucristocøxpä. Cab hajxy jaduhñ yajñähixø'øy ja'a Dioshespíritucøxpä neby højts nyajñähixø'øyän. Paquiä mijts ja'a miädia'agyhajxy jaduhñ mbadu'ubøjcä. ⁵ Yø'ø häna'c-hajxy jaduhñ wiing yajñähixøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexypän, neby jaançh tehñ jiajpän. Cab jaduhñ yhoyyä coo hajxy mmänä'anät cooc tyijy hajxy miaas jaty queeçh høøçh njaty. ⁶ Wehñdäda'a jaduhñ tiøyyä cooçh hoy yajxon nga'a xi'igy nga'a mädi-a'agy; cab jaduhñ ñejpiä. Pero tøyhajt jaduhñ cooçh ma-diu'u njaty nnajuø'øy ja'a Diosmädia'agyquiøxpä. Homiä-naajä højts mijts ja'a tøyhajt nmo'oy hoy ñä'ä tiiguiøxpä.

⁷ Mänäajøch mijts ja'a Diosmädia'agy nyajwiin-gapxø'øyän, cáboch mijts jaduhñ mänaa nnämaayy cooçh mijts xmiäjúyät. Niguiudúunäbøch hänäjty hamdsoo, je'eguiøxpä cooçhä njoot hänäjty chocy coo mijts ja'a Diosmädia'agy maas hoy mmäbøgät. Y cooçh hänäjty hamdsoo nniguiudúunäxä, páadyhøçhä jäya'ayhajxy näje'e xñänømy coogøch tyijy hänäjty hoy nga'a cudiuñ. Pero cab jaduhñ tiøyyä. ⁸ Wiingjäya'ayhøçhhajxy hänäjty xpiuhbejp, ja'a Diosmädia'agy hajxy hänäjty mäbøjpä wiingtuumjaty. Páadyhøch hajxy hänäjty xpiuhbety cooçh mijts ja'a Diosmädia'agy hänäjty nyajwiingapx nyajwiinmädiaagø'øy. ⁹ Mänäajøch jim nhitiän maa mijtsän, cáboch hänäjty pøn nnäma'ay cooçh hajxy xpiuhbédat xädø'øñhaam, hóyhøch hänäjty tii nja yajmaajiaty tähoocjaty. Hiç, xpiuhbéjpøçhä jäya'ayhajxy hänäjty, ja'a Diosmädia'agy hajxy hänäjty mäbøjpä,

ja'a hajxy hānajty jim̄ tsohm̄bā Macedonia-naaxooty. Xmióobiöch hajxy hānajty tijátyhøch hānajty nyajmaajiajpy. Y cábøch mijts mānaa nnāma'awa'añ coöch mijts xpiuhbédät xädø'øñhaam. ¹⁰Tømiädiáacpøch jaduhñ nebiä Jesucristo tiømiädia'aguiän. Cábøchä xädø'øñ pøñ nmäyujwa'añ jim̄ maa mijts mdsāna'ayän Acaya-naaxooty. ¹¹Coo pøñ jaduhñ miáná'anät cóogøch tyjy mijts nga'a tsoçy, høhñdaacp hajxy jaduhñ. Ja'a Dios jaduhñ najuøby coöch mijts njaanč tehñ chocy njaanč tehñ pia'häyoy.

¹²⁻¹³Jii hāna'c-hajxy näje'e wiädity mäwiinhøhm̄bā. Ja'a Jesucristäc tyjy hajxy tøø wyiinguexyii coo ja'a Dios-mädia'agy hajxy yajwá'xät maa ja'a mabøjpädøjc-hajxiän, neby højts ja'a Jesucristo tøø xwyiinguexiän coo højts ja'a Diosmädia'agy nyajwá'xät. Pero høhñdaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduhñ yhøhñda'agy coo hajxy yajcumaya'añ. ¹⁴⁻¹⁵Yø'ø hāna'c-hajxy, ja'a møjcu'ugong hajxy wyiindsøn̄hajpy. Jaaya'ay hajxy jaduhñ piahijxyp. Nnajuøøyyäm hajxy coo ja'a møjcu'ugong ñibiäda'agyii nebiä jaanč tehñ yhoybän, nebiä Diosmoonsän. Hoorä, cab jaduhñ yhoy-yagjuøøñä coo ja'a møjcu'ugongä mioonsähajxy pi-ajatcø'øy, coo hajxy yhøhñda'agy cooc tyjy hajxy tøø wyiinguexyii ja'a Jesucristäm. Y coo hajxy jaduhñ haxøøg jiäya'ayhaty, je'e hajxy jaduhñ quiümädowaamby.

¹⁶Hoorä, chámhøch mijts nmägápxcombä. Cab hajxy jaduhñ mmáná'anät cóogøch tyjy tøø nguhhiñ, hóyhøch weeñtiä nja niguiumayii. Pero, pø mjaanč mānaamb hajxy jaduhñ cóogøch tyjy tøø nguhhiñ, huuc tunä mayhajt hajxy, høøchä nmädia'agy hajxy weeñtiä huuc hamädoowhíjtäc. Nhuuc nimiädia'agyíjøch weeñtiä. Nhuuc niguiumayíjøch weeñtiä. ¹⁷Cábøch nmāna'añ coöchä Dios ja'a cuhdujt tøø xmio'oy coöch jaduhñ nniguiu-

mayójät. Jaduhñhöch nniguiumayii nebiä cuhhiimbän. ¹⁸ Hiç, ja'a jäya'ayhajxy nämaybä, miäniguiumáayyáp hajxy tijaty hajxy yaa miøød hädaa yaabä naaxwiin, møød tijaty hajxy jaduñ tøø tiuñ. Jaduhñch høøchpä, wéeñtiöch cham nmäniguiumayáanäbä tijátyhöch tøø nduumbä. ¹⁹ Jaduhñ mijts mjaanč tehñ ñibiäda'agyii nebiä jaanč tehñ jiajpän nebiä jaanč tehñ ñajuøöbiän. Paady mijts ja'a cuhhiimbähána'cä miädia'agyhajxy mhamädoowhidaaná. Pero cab hajxy tøyhajt mjaanč jaty mjaanč najuø'øy. ²⁰ Hiç, mmee'xtujpy hajxy hoy ñä'a tijatiä, hoy mijts yø'ø häna'c-hajxy hoy ñebiatii xjia häyoowhixy, yø'ø häna'c-hajxy hønndaacpä, yø'ø miädia'agy hajxy mjaanč tehñ yhamädoowhidáanäbä. Xyhanehmb mijts jaduñ nebiä moonsän. Y xñägáayyáp xñähúucáp mijts ja'a mxädø'øñ. Xwyiinhøhmb mijts yø'ø häna'c. Xpiejxp mijts yø'ø häna'c. Høxtä xquiojxp mijts yø'ø häna'c, y cab hajxy waamb mmäna'añ. Cab mijts yø'ø häna'c xyhixy nebiä jäya'ayän. ²¹ Pero højts, cab mijts jaduñ mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy hønndaacpä. Cab højts jaduñ njoot-møjjä.

Chámhöch weeñtiä nhuuc mädia'agángumbä nebiä cuhhiimbän. Tijaty yø'ø häna'c-hajxy miäniguiumáayyáp, nmøødhøchä cuhdujt høøchpä coöch jaduñ nmäniguiumáayyäbät. ²² Niguiumáayyáp hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tiedyhajty møødä Israel. Pues jaanä jaduñch høøchpä, jaduñch nniñänøømäbä coöchä Abraham tøø nhaphajpä tøø ndeedyhajpä. ²³ Jaduhñ hajxy ñiguiumáayyäbä je'eguiøxpä cooc tyijy hajxy mioonsähadyii ja'a Jesucristøm. Pues xmioonsähájpøchä Jesucristo høøchpä. Y maas hóyhöch nduñ que yø'ø häna'c-hajxy tiuñ. Coöch

jaduhñ weeñtiä nniguiumayii, jaduñ yajmädooy nebiä cuhhiimbähajxy miädia'aguiän. Maas möc-höch tøø nduñ que yø'ø häna'c-hajxy tøø tiuñ. Mayhóoc-höch tøø nyajtsumy tøø nyajmach. Ni pøñ jaduñ quia'a yajtsumy quia'a yajmachñä nébiöch tøø nyajtsumiän. Mayhóoc-höchä häna'c tøø xjiaanç tehñ wiobho'ogy. Mayhóoc-höchä häna'c ja'a weenjaty tøø xquia'a yagho'ogy. ²⁴ Mägoöxc-hóoc-höchä judíoshajxy tøø xjiu'xy hii'xmajmocxmädaaxcø'ø. ²⁵ Tägøøghóoc-höchä häna'c tøø xwiopy paxyhaam. Tähóoc-höchä häna'c xjia ca'ch; xquiuhga'adsáamböch hajxy hánajty. Tägøøghóoc-höchä barco tøø xmiäma'adø'øy mejjiooty. Xjia möødnøøguguíñhöch jaduñ. Mänáajöchä barco tähooc xmiägüiññän, tu'xøöch jiiby nhijty mejwyiing möød tu'tsuhñ. ²⁶ Mayhóoc-höchä yoñdiu'u tøø ndu'uyo'oy. Mayhóoc-höch ja weenjaty tøø nga'a nøøho'ogø'øy möjnøøgujc. Tøøchä mee'tspädøjc mayhooc nyohbiaady. Tøøchä nhamdsoo mägunaax mayhooc xjia yagho'oga'añ. Tøøchä wiinghäna'c xjia yagho'ogaambä; ca'a yhøöchä nmägunaaxhajxy je'e. Tøøch nwädity mäjahñdiuum jim cajptooty, möød jim pactuum, möød jim mejjiooty. Tøøchä häna'c mayhooc xchaaçhtiuñ, ja'a hajxy jaduñ mänaambä cooc tyijy hajxy miäböcy. ²⁷ Tøøchä tuung mayhooc xyaghanuu'xø'øy; høxtä xyajtsaaçhpøjc-höch jaduñ. Mayhóoc-höch tøø ndsunaxy jamia'ay jayhity. Tøøchä yuu mayhooc nmänaxy nyajnaxy möødä tödsø'ø. Tøøch mayhooc nhity jaguiay jayhu'ogy. Tøøchä tøøchpä mayhooc nmänaxy nyajnaxy. Nja yajmaajiäjpöchä wit tucxy hánajty.

²⁸ Tøøch madiu'u ndsaaçhpøcy, pero cáböch jaduñajtä ngøxy mädia'aga'añ. Je'eçh nmädia'agaamby coöchä mäböjpädøjc jabom-jabom nnädajy nnämay wiinduh-

m̄chajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity. ²⁹ Pønä Diosmädia'agy hoy ca'a cudiunaamb, hoy hajxy jia mäsøcy, nnäjootmay-hájpiøch hajxy jaduhñ. Pøn jaduhñ cädiehby je'eguiøxpä coo tøø wyiinhøøñii, nmäjootma'adhájpiøchä häna'c ja'a tøø miäwiinhøøñäbä. ³⁰ Høøch, cábøch nyajcumaya'añ. Pero cooçh häxøpy nyajcumaya'añ, je'eçh häxøpy nya-niguiumayáanäp cooçhä häyohn mayhooc tøø nmänaxy tøø nyajnaxy. ³¹ Ja'a Dióshøch jaduhñ xñajuøøby cooçh nga'a hønñda'agy. Ja'a Jesucristo ja'a Tieedy je'e. Tsögä Dios hajxy cøjxta'axiøø wiingudsähgøøyyäm. Ja'a Jesucristo hajxy nWiindsøn'hájtäm. ³² Mänaa ja'a Aretas hänäjty tiuñän gobiernä, mänítøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hänäjty jaduhñ. Jia pädaac ja'a hadánaabiä hajxy majatiä tægø'øwøødiaact nébiøch jaduhñ nga'a pädsómät. ³³ Pero päyø'c-høch. Ja'a nmägu'ughajpøchhajxy hoy xquiuhdøøñäxy cachjooty maa ja'a muuçh hänäjty jiutän.

12

¹ Cab jaduhñ yhahixø'øy cooçh nyajcumáyät. Pero nébiøch chamñ nmädia'aga'añän, jaduhñ yajmädowa'añ nébiøch nyajcumaya'añän. Je'eçh chamñ nmädia'agaamby nebiátyhøchä Jesucristo hijxtahñd tøø xyajwiinhixiän. ²⁻³ Nmøødhípiøchä Jesucristo tu'ugmädia'agy. Tøø yhijnä majmactsjumøjt cooçhä Dios jim tøø xyaghoy tsajpootyp maa ja'a wyiinduumän. Cáboch nnajuø'øy pø ni'xhaam pø copc-háamhøch jim nhooyy, o pø juøhñdyhaam. Ja'a Dios jaduhñ nidiuhmñ najuøøby. ⁴ Madiú'ujøchä hoy-yagjuøøñäjatypä jim nmädooyy tsajpootyp. Cábochä cuhdujt nmøødä cooçh nmädiaactägátsät. ⁵ Coo wiinghäna'c häxøpy jim tøø yhoy

tsajpootyp, mänítøch häxøpy nmøjpäda'aga'añ. Pero høøch, cábøch hamdsoo nniguiumaya'añii. Jagóoyøch nmädia'aga'añ nebiátyhøchä häyohn tøø nmänaxy tøø nyajna_{xy}. ⁶ Nmóødhøchä cuhdujt jadu_{hñ} coo_{ch} nmädiá'agät nebiátyhøchä Dios tøø nmøødtu_ñ. Hi_x, tøyhájt_{høchä} Dios jadu_{hñ} tøø nmøødtu_ñ. Cábøch nmädia'aga'añ coo_{ch} jim_ñ nhooyy tsajpootyp, je'eguiøxpä coo_{chä} njoot quia'a tso_{cy} coo_{ch} pø_ñ xmiøjpädá'agät. Coo_{chä} jäya'ayhajxy xyhíxät coo_{ch} hoy njäya'ayhaty, coo_{ch} hajxy xmiädówät coo_{ch} hoy ngapxy nmädia'agy, mänítøch hajxy xquiumáyät.

⁷ Jaan_{ch} teh_m yhoy-yagjuøøñájátyhøch jim_ñ nwiinhijxy tsajpootyp. Pero cabä Dios ja'a jioot chocy coo_{ch} nniguiumayóøjät. Paadiä Dios miänaa_ñ coo_{chä} møjcu'ugong ja'a tsaachpä xyajpáadät, jadú_{hñ}høch hamdsoo nga'a niguiumayóøjät. ⁸ Tägøøghóoc-høchä Jesucristo nja mänuu'x-taacy coo_{ch} cu xyajná_{hwa}ach. ⁹ Mänítøch xyhadsooyy: “Njaan_{ch} teh_m chojpy njaan_{ch} teh_m pia'häyóobiøch mi-i_{ch}. Páadyhøch mií_{chä} mdsaa_{ch}pä nga'a yajná_{hwa}'ad-sa'añ, nyajcä_{hxø}'øgáambiøch jadu_{hñ} coo_{ch} mii_{ch} mdu_ñ ja'a høøchä nmäjaagøxpä”, nó_mhøchä Jesucristo xñämaayy. Xoondáacpøch jadu_{hñ} coo_{chä} ndsaa_{ch}pä xquia'a yajná_{hwa}'adsaannä, je'eguiøxpä coo_{ch} tøø xñäma'ay cóogøch xyajtuna'añ ja'a miäjaagøxpä. ¹⁰ Xoondáacpøch jadu_{hñ} coo_{chä} Jesucristo xyajtu_ñ, hóyhøchä tsaachpä nja paady madiu'u. Náxyhøchä häna'c xyhäyoowhixy. Náxyhøch cøxiä wiinä nyajmaajiaty. Náxyhøchä häna'c xchaachtu_ñ ja'a Diosmädia'agyquióxpä. Náxyhøchä häyohn nmänaxy nyajna_{xy}. Pero cábøch nnä'ägä møj_{pä}da'agy coo_{ch} jadu_{hñ} njaty nhabet_y. Hi_x, coo_{ch} jadu_{hñ} njaty nhabet_y, cä_{hxø}'p jadu_{hñ} coo_{ch} tii nga'a tu_ñ ja'a nhamdsoo mäjaaháamhøch; ja'a Jesucristo miäjaaháamhøch jadu_{hñ} ndu_ñ.

¹¹ Hoorä, hóyhøch tii nga'a ja jada'añ hamdsoo, nmaas jájpiøch høøch quejee yø'ø häna'c-hajxy, yø'ø hajxy jaduhñ niñänóømäbä cooc tyijy hajxy Dyioswiinguexiä. Cábäc tyijy pøn jaduhñ jiaty nébiäc hajxy jiatian. Y cooçh yø'ø häna'c-hajxy jaduhñ tøø xñähwaambety, tiich mijts jaduhñ coo tøø xquia'a nähgapxtu'udy. Cooçh mijts tøø xquia'a nähgapxtu'udy, páadyhøch cham hamdsoo nniñähgapxtu'udyii. Jaduhñ weenjaty yajmädooy nebiä yajcumayaambän. ¹² Mänäajøch jim nhitiän maa mijtsän, mäníthøchä hijxtahñd madiu'u nyajcähxø'cy hoy-yagjuøøñjatypä. Ja'a Diosmäjaaháamhøch jaduhñ nyajcähxø'cy. Nyajcähxø'c-høch jaduhñ cooçhä Dios jaduhñ tøyhajt tøø xwyiinguexy. Mee'xtújpøch hanaajty. ¹³ Jaançh tehñ yhóyhøch nduñ hoy miädyii tsajtøgootiä. Jaanä jadúhñhøch jim hoy nduumbä maa mijtsä md-sajtøjcän. Pero je'e mijts mga'a hojiäwøøby cooçh mijtsä xädø'øñ tøø nga'a mäyujwa'añ nébiøch wiingtuumjaty nyujwa'añän. Jaançh tehñ wyiingä wiinmahñdy hajxy mmøødä. Pø tøøch mijts nyagjootma'ady, høøch hajxy huuc méé'xäc.

¹⁴ Metsc-hóoc-høch jim tøø nhooñä maa mijtsän. Miädägøøghóocpøch cham nnøcxáangumbä. Cábøch mijts tii nmäyujwa'ana'añ. Cábøchä njoot chocy coo hajxy tii xmió'owät. Jaduhñ mijts ndsocy nebiä hamdsoo huungpän, paady mijts jaduhñ nbuhbeda'añ. Pero cápøch nmäna'añ cooçh mijts xpiuhbejtägätsät xädø'øñhaam. ¹⁵ Tøøchä njoot hamuumdu'joot nbäda'agy maa mijtsän coo mijts nbuhbédat hoy ñejpiä, hóyhøch cøxypänejpiä cu nja jat cu nja habet maa mijtscøxpän. Njaançh tehñ chojpy mijts jaduhñ; pätiidä mijts jaduhñ coo xquia'a tsojtägach.

¹⁶ Mänäajøch jim nhoyyän maa mijtsän, cab mijtsä xädø'øñ nmäyujwaañ. Mnajuøøby hajxy jaduhñ, tuhñds.

2 Corintios 12:17 362 Corintios 12:21

Pero näje'le mijts jaduñ mmäna'añ cóogøch tyjy mijts tøø nwiinhøøñ ¹⁷ mänáajøchä nmägu'ughajpähajxy jim nguexiän maa mijtsän xädø'øñyajmujpä. Jadúñägäts tyjy mijts tøø nmämeech. Pero cab jaduñ tiøyyä. ¹⁸ Mänáajøchä hermano Titohajxy jim nguexiän maa mi-jtsän møødä mägu'ughajpä tu'ugpä, ni je'le mijts xquia'a mämeel'tspä. Hiç, jaduñä hermano Tito howyiinmahñdy hajxy mióødäbä nébiøch nmøødän. Hoguiuhdujt hajxy mióødäbä nébiøch nmøødän.

¹⁹ Jaduñ mijtsäda'a mmäna'añhaty cooc tyjy højts nja wi'i ñiñähgapxtu'uda'añii maa mijtscøxpän. Pero cab jaduñ tiøyyä. Ja'a Dios højts xyhixp coo højts ja'a Je-sucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduñ nyajwiin-gapxø'øy, chojpy højtsä njoot jaduñ coo mijts hamuum-du'joot mjaac mäbøgät. ²⁰ Cooch jim nnøcxtägätsät maa mijtsän, mänitøch jootcujc nhídät pø hoy hajxy hánajty mwädity. Jaduñ hajxy jootcujc mhíjpät ja'a høøchcøxpä. Pero pø cab hajxy hánajty hoy mwädity, jootmay-hádäbøch jaduñ. Jaaná jaduñ mijts mjootmayhájpät. Je'eçh jaduñ cham nnädaj nnämaaby. Je'eçh jaduñ nnänøømby ja'a ca'a howiädit, pø mnimiädsibøyyäp ha-jxy hánajty, pø cab hajxy hánajty myajniyajmädsogyii, pø mnimiäjootmä'täp hajxy hánajty, pø mnimiädsiphájtäp hajxy hánajty, pø mniwyiingapxpéjtäp hajxy hánajty, pø mniñänøømäp hajxy hánajty cøxypä waamb, pø mnigu-iumáayyap hajxy hánajty, pø mdsipyagíjtäp hajxy hánajty. ²¹ Pø jaduñ hajxy hánajty mjaançh jootcø'øy cooch jim nnøcxtägätsät maa mijtsän, wéñdøchä Dios ween-jaty xyajtsähdiúnät maa mijtscøxpän. Je'eçh cham nnädaj nnämaaby. Nnäjootmayhádäbøch hajxy je'e, pønjatia yhaxøøgcuhdujt hajxy hánajty tøø quia'a najtshixø'øy. Je'eçh jaduñ nnänøømby coo wiingto'oxiøjc hajxy pi-

awädity tehngajnä.

13

¹ Miädägøøghóocpøch jim nnøcxa'añ maa mijtsän. Jaduhnä cuhdujt myiñ, coo hajxy hänajty pøn mnäxø'øwø'øwa'añ, tsipcøxpä testigo hajxy myajcähxø'øgät mejtstägøøg. ² Mänájøch jim nhuug hoobiän maa mijtsän ja'a miämetsc-hoocpä, mänítøch hajxy nyajcuhojøøyy coo hajxy haxøøg quia'a jootcøñät, pønjaty hänajty haxøøgwädijp. Y chámhøch mijts jadähooc nnäma'awáangumbä nägøxiä coo hajxy mga'a haxøøgwädítät. Y pø je'enä hajxy hänajty mhaxøøgwädity cooch jim nnøcxtägátsät maa mijtsän, tsipcøxpøch mijts nøcxy nyajcumädowa'añ.

³ Jadúhnhøch nyajcähxø'øga'añ coochä Jesucristo miädia'agy tøyhajt nyajnaxä. Haa ca'a, jadúhnhøch mijts tøø xyhuuc nämaabiä cooch jaduñ nyajcähxø'øgät. Hix, møcmäjaahaamä Jesucristo hajxy xyajcumädöwät coo hajxy hoy mga'a wädítät. ⁴ Coo ja'a Jesucristo miøjpahbejtä cruzcøxp, cabä miøcmäjaa hänajty yajcähxø'øgy. Pero coo jiuypjøjtägajch, coo jim ñøcxtägajch maa ja'a Tieediän, jíñäts jaduñ yhiñä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduñ højts mäjaa nga'a møødäbä hamdsoo. Pero coo højtsä Jesucristo nmøødhity tu'ugmädia'agy, paady højts mijts hoy nhane'ema'añ ja'a Dios ja'a miøcmäjaahaam.

⁵ Huuc niñajuø'øwøø hajxy hamdsoo. Coo ja'a Jesucristo ja'a miädia'agy hajxy hoy mbanócxät, jaduñ hajxy myajnajuø'øwät coo ja'a Jesucristo hajxy tøyhajt mjaançh møødhity tu'ugmädia'agy. Pero coo hajxy hoy mga'a panócxät, cabä Jesucristo hajxy tøyhajt mmøød-hidät tu'ugmädia'agy. ⁶ Chøjpy højtsä njoot coo ha-

jxy mnajuó'owät coo højtsä Jesucristo tøyhajt nmøød-hity tu'ugmädia'agy. Cab højts jaduhñ nhøhnda'agy. ⁷ Nmānuu'xtaacypy højtsä Dios coo hajxy hoy mwädítät, coo hajxy haxøøg mga'a jäya'ayhädät. Pø mwädiyp hajxy hānajtý hoy coo højts jim nnøcxtägätsät maa mijtsän, cab højts hānajtý nyajcāhxø'øga'añ coo højtsä Jesucristo ja'a cuhdujt tøø xmio'oy coo højts mijts nyajcumädówät. Y coo højts jaduhñ nga'a yajcāhxø'øgät coo højtsä Jesucristo ja'a cuhdujt jaduhñ tøø xmio'oy, cab jaduhñ ñeipiä. Je'e højtsä njoot chojpy coo hajxy hoy mwädítät. ⁸ Pø mjaanč wädiyp hajxy hānajtý hoy coo højts jim nnøcxät, cab højts mijts hānajtý waamb nnāma'awa'añ. Chojpy højtsä njoot coo hajxy tøyhajt hoy mwädítät. Pero pø cab hajxy hānajtý tøyhajt hoy mwädity, mänit højts mijts mábocy nhoja'añ. ⁹ Coo hajxy hoy mwädítät, xoondá'agäp højts jaduhñ. Cab højts jaduhñ nyajcāhxø'øgät coo højtsä Jesucristo ja'a cuhdujt hānajtý tøø xmio'oy coo højts mijts jaduhñ nyajcumädówät. Nmānuu'xtaacypy højtsä Dios jaduhñ coo ja'a mhaxøøgcuhdujt hajxy mgøxy najtshixø'owät, coo ja'a hoguiuhdujt hajxy hamuumdu'joot mjaac panøcxät tehngajnä. ¹⁰ Páadyhöch mijts cham weenjaty nhojy nocyhaam, jadúhñhöchä njoot chocy coo hajxy hoy mwädítät. Ja'a Jesucristøchä cuhdujt jaduhñ tøø xmio'oy maa mijtsøxpän, weenä miädia'agy hajxy maas hoy mjaac mábøjcä. Cabä Jesucristo jioot chocy coo hajxy mdü'udägóyyät. Y pø mjaanč wädiyp hajxy hānajtý hoy cooçh jim nnøcxtägätsät maa mijtsän, cábøch mijts hānajtý waamb nnāma'awa'añ. Pø caj, mänit højts mijts mábocy nyajcumädówät.

¹¹ Hoorä, mägu'ughajpädøjc, chámhöch jaduhñ nyajmayaanä maa hajxy cham nmägäpny nhane'emiän. Huuc cudiún hajxy jaduhñ nébiøch cham nnāma'ayän. Yaghoyø'ow ja'a mdü'u hajxy. Ca'a haxøøgtu'u hajxy

mbanøcxnä. Tsøc hajxy jaduhñ nimiøødhíjtäm tu'ug-mädia'agy. Cab hajxy tii myajtsip myajma'adóøñät. Jaduhñä Dios hajxy xmiøødhíjnät. Xchójcäm ja'a Dios hajxy. Chojpiä jioot jaduhñ coo hajxy jootcujc nhíjtämät.

¹² Mniyajpoo'xøøjäp hajxy hamuumdu'joot, ween jaduhñ quiähxø'øgy coo ja'a Diosmädia'agy hajxy mmäbøcy.

¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mäbøjpä.

¹⁴ Weenä Jesucristo hajxy nägøxiä xmiø'oy ja'a hoyhajt ja'a weenhajt. Je'e hajxy nWiindsønähíjtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 19 Oct 2021 from source files dated 9 Oct 2020

4e564219-157f-5807-b810-47a15308b8b8